

حقوقی بیکیں مجموعہ سی

آئندہ بر نشر اول نور

شورای دولته تمیز صورتیه نهائی و قطعی اوله رق تدقیق ورؤیت اولنان مواد ،
اولاً ، بر مجلس اداره دن و بریلوب مافوق مجلس اداره ده ایکنجی درجه ده تدقیق ایدیلن
قرارلر ؛ ثانیاً ، ولایت مجلس اداره لر دن و بریلن قرارلر ؛ ثالثاً ، مجلس اداره لر دن
باشقه اداری مرجعلر دن صادر اولان قضائی قرارلر ؛ رابعاً ، اداری مسأله لر حقنده
خصوصی قانونلرله معین تمیز مرجعلر دن چیقان قضائی قرارلر در .

شورای دولت ، طرفینک عدم صلاحیت و یا تجاوز نفوذ ، یا خود اصوله مخالفت
اداسیله تمیزاً تدقیقی طلب ایله دیکی بالجله مقرراته وضع ید ایلر . بوکی احواله قرار
- ولو درجه نهاییه ده اتخاذ ایدلش اولسون - شورای دولتک یکیدن تدقیقات اجراسنه
صلاحیتی واردر .

تشکیلات اداریه نیک المستحسن جهتی بودر . شورای دولت بو یولده حرکت
ایتمکله حقوقی مختل اولانلره قارشی بر ملجأ قانونی وضعیتی آلمش اولور دیگر طرفن ده
اداره یی مخالف قانون حرکات دن وقایه ایلر .

دعای اولادار نیک اصول محاکمه سنه دائر موضوعات قانونیه نیک خارجنده قالان خصوصات
ایله فروغانده اصول محاکمات حقوقیه و احکام تعاملیه یه توقیق حرکت اولور .

ملفا شورای دولت اعضاسندن

مهر عزت

صلاحیت قرارلری

صلاحیت - انواعی - ۲۱ مارت ۱۳۴۰ قانوننک صلاحیت حقنده کی احکامی

و نقصانلری - مقایسه قوانین

§ « اصول محاکمه حقوقیه و جزائی و صلح و اجرا قانونلرینک بعض ماده لرینی
معدل ۲۱ مارت ۱۳۴۰ تاریخلی قانون ، محکمه لر طرفن دن اتخاذ اولنان صلاحیت
قرارلرینک قانونی نتیجه لرینی تعدیل ایتمکده در . انجق قانوننک بعض نقطه لرده سکوئی
تعمیقاً نه مشکلاتی ایجاب ایتمش و بعض محذورلر تولید ایتمشدر . مقاله مزده بو تعدیلاتی
و راقده یی نقصانلرک فصل اکیال ایدلمسی ایجاب ایتمکدن تدقیق ایده جکزه . بواضا حاکمک
لایقینه اکلایشله یلمسی ایچون ده احکام سابقه یی خاطر لایقینه و بو مناسبتله صلاحیت
حقنده کی یکی نظریه لری بیانی فائده لی عد ایتدک .

§ صلاحیت ، محکمه نك كندیسنه عرض اولئان دعوائی حل وفصله مأذونیتدر .
 غرب قانونلرنده اولدینی کبی اصول محاکمه حقوقیه قانونمزمده هر محکمه بی بوتون
 دعوائری رؤیته مأذون ایتیمون بوبابده تقيیدات و تحدیدات وضع ایتمشدر . بو تحدیدات
 ایکی شکله اولمشدر . بری ایشلرك نوعی ، ماهیتی اعتباریله اولان تحدیداتدر . هر محکمه
 قانوناً صلاحیتی داخلنده اولان ایشلری رؤیته مأذوندر دیگر نوع ایشلری رؤیتدن
 منوعدر . بونقطه نظر دن محکمه نك دعوائی رؤیت صلاحیتنه تعاملاً « وظیفه » دیرلر .
 دیگرى طرفینك وضعیتلری ، بولندقلری محل اعتباریله اولان تحدیداتدر :

برنوع ایشی رؤیت صلاحیتی حائز اولان محکمه ، او نوعدن بالعموم دعوائری
 رؤیت ایده بیلمك ایچون آریجه طرفینك بولندقلری موقع اعتباریله ده دعوائی رؤیته
 صلاحیتدار اولان لازمدر . محکمه نك بونوع صلاحیتنه ده تعاملاً « صلاحیت » دیرلر .
 ماهیه وظیفه و صلاحیت ، محکمه نك دعوائی رؤیت ایده بیلمك اهلیتک مختلف
 شکللری اولدیفندن و هر ایکسی حقنده مشترک احکام بولندیفندن غرب قانونلری
 هرایکی نوع مأذونیت ایچون صلاحیت تعبیری قوللانمقده درلر . ازجمله فرانسه ، آلمان ،
 یکی اصول محاکمه حقوقیه قانونمزمك ابتدائی لایحه سنك اقتباس ایدلیدیکی سوپجره نوشاتل اصول محاکمه
 قانونلری صلاحیتی ، بری مصلحت اعتباریله صلاحیت ، (compétence à raison de
 la matière) دیگرى محل اعتباریله صلاحیت (compétence à raison du lieu) اولمق
 اوزره ایکی به تقسیم ایتمشدر .

§ ایکی نوع صلاحیت اراسنده حکماً فرق واردر . بوفرق شو صورتله ایضاح اولنه بیلیر:
 مصاحت اعتباریله صلاحیتک تحدیدی منفعت و انتظام عمومی ملاحظه سنه استناد
 ایدر . واضع قانون بعض نوع ایشلرك ، او ایشده متخصص و اونى مسلک وصنعت اتخاذا
 ایتمش اولان حاکم واسطه سیله رؤیتی منفعت عمومیه ده موافق بولور ، ویاخود
 بعض خصوصى اوصاف و قابلیتى حائز اولان حاکم له حل ایتدیرلمسده منفعت ملاحظه
 ایدر . بو حالده طرفین اتفاق ایتسه لر بیله صلاحیتدار اولمایان محکمه دعوائی حل ایده مز .
 اوروباده ، ازجمله فرانسه ده تجارت محکمه لری ، صنایع محکمه لری ، بحرسفید بالیقچیلر
 محکمه سی تجار ویا فابریقه طور وعمله و بالیقچیلر طرفدن کندی اره لرندن منتخب حاکم لردن
 تشکیل اولنمشدر . صلح حاکم لری ده هر ایشی محکمه یه کیتمه دن ، صلحاً انتاج
 و بو صورتله انتاج ایده مدیکی اوفق منازعه لری عدالتک اقتضاسنه کوره حل ایتک اوزره
 تأسیس اولنمشدر .

بو محكمه لر تأسيسلرني ايجاب ايتش اولان ايشلردن بشقه سني رؤيت خصوصنده حق قضايي حائر دكلاردو . بناءً عليه رؤيتي بوصورته استثنائي وخصوصي برمحكمه يه عائد بولميان هر دعوى عمومى محكمه لوده رؤيت اولمق لازمدر .

§ زدهده وقتيله بو ملاحظه لر ايله خصوصى محكمه لر تأسيس اولمش ايدى . انجق صوك زمانلرده بو محكمه لك حكمت موجوديتي قلمادى .

محكمه شرعيه ، وقتيله هر نوع منازعه لرى حل ايجون تام صلاحيتلى برمحكمه ايدى . فقط عثمانلى دولتي اوروپا ايله تجارى مناسبتلره كيريشديكي زمان ، بو مناسبتده احكام شرعيه يه اويمايان غرب تعامللرى ، قانونلرينك ويا بوكامائل حكملرك تطبيقى ضرورتى حاصل اولدى . دولت ، اجنيلرك بربرى آره سنده كي اختلافلرده ايلك زمانلرده كندى رضا و اختياريله فقط دهاصو كره عهدى بر مجبورييت ايله قونسولوخانه محكمه لر ينك حق قضاسى وغير مسلملرك نكاح و طلاق لرى خصوصنده اصدار اولنان فرمانلرله بطريقخانه محكمه لر ينك صلاحيتى طانيدي وبوصورته ايلك استثنائي محكمه لر تشكىل ايتدى . عثمانلى نبعه سنكده ، تجارتك انكشافي ايجون ضرورى اوله رق اوروپاده مرعى تعامللرى قبول ايتسنه و معاملات تجاريه دن متولد نزاعلرك بو تعامللره اويمايان احكام فقهيه ايله حلى موافق كوريله مامسنه بناءً بو خصوصده صلاحيتدار اولمق اوزره ۱۲۵۶ سنه سنده تجارت محكمه سى تشكىل اولندى . ۷۰ شوال ۱۲۷۶ تاريخلى ذيل قانون تجارت ايله تجارت محكمه لرى تنسيق اولندى . بو محكمه لر دولتجه منصوب اعضا لر ايله تجار طرفدن آره لرندن منتخب اعضاى موافقه دن مركب ايدى . بو محكمه لر احكام شرعيه يه توفيقاً دكل ، تجار آره سنده كي تعامللره و عدالتك اقتضاسنه كوره حكم ايده جكلر ايدى .

دولت يواش يواش اوروپا قانونلرندن ترجمه ، اقتباس صورتيه قانونلرني تنظيم سياستبنده دوام ايتدى . فقط بو قانونلرك تطبيقندن متولد اختلافلرده محاكم شرعيه ، ده ا زياده احكام شرعيه يي نظر دقنه آلد يگندن بوشكل ايله بو قانونلرك عملدن ساقط اولمى ضرورى كورونيور ايدى . اونك ايجون قوانين و نظامات موضوعه نك تطبيقندن متولد اختلاف لرى حل ايتك اوزره ۱۲۹۵ سنه سنده محاكم نظاميه تأسيس اولندى .

حين تشكىلنده استثنائي برمحكمه اولان محاكم نظاميه نك صلاحيتى يواش يواش توسيع اولندى . بالعكس محاكم شرعيه استثنائي بر محكمه حالى آلدى . ۱۳۴۰ سنه سنده دولت ، اداره عموميه نك لاييك اساسلره استناديني ضرورى عدايتديكندن ۸ نيسان ۱۳۴۰ قانونيله محاكم شرعيه يي بستانون الفا ايتدى .

صلح محكمه لری ایسه کوچك ایشلرك اصحاب مصالحه ده یقین اولان محللرده رؤیتی تأمین و محاکم عمومیه نك ایشلرینی ازالتمق مقصدیله تأسیس اولمشدر .

۲۸ مارت ۱۳۴۰ تاریخی کوی قانونی محلی اختیار مجلسلرینه صرف عدالتک ایجابی نظر دفته آلهرق حکم ایتمک صلاحیتی طامیش اولدیغندن بومجلسلرده استثنائی برمحكمه درلر .

۱۳۲۵ قانونی تجارت محكمه سنده موقت اعضائی الغا ایتدیکندن تجارت محكمه سنكده او وقتدن بری حکمت موجودیتی قلاماش ایدی . بناءً علیه اهمیتز ایشلری رؤیت ایتمک اوزره طرفینه یقین اولمق اوزره تأسیس ایدلمش اولان صلح محكمه لرندن بشقه بوتون استثنائی محكمه لری الغا ایتمک فائده لی اوله جق ایدی . ۸ مارت ۱۳۴۰ تشکیلات محاکم قانونی تنظیم اولنور ایکن بو ملاحظات حاکم اولدی .

§ محل اعتباریله صلاحیت ایسه بالعکس طرفینک ادعا و مدافعه لرینی محكمه ده بیان خصوصنده مشکلاته معروض قلاماماری ایچون ققید اولندیغندن طرفین ، منفعتلری ایچون موضوع اولان احکام قانونیه نك تطبیقندن فراغت ایله دعوالرینی صلاحیتدار اولمایان حاکم حضورنده رؤیت ایتدیره بیلرلر .

§ اصول محاکمه حقوقیه قانوننك ۲۳۳نجی ماده سی دالتدن اکلایشیلدیغنه کوره محكمه مصلحت اعتباریله صلاحیتی رأساً نظر دفته المقله مکلفدر . طرفینک بوبابده کی موافقتلری محكمه نك صلاحیت اصلیه سنی توسیع ایچون کافی دکلدر . فی الحقیقه خصوصی برمحكمه نك اتخاذ ایده جکی قرارلر ایله رؤیتی دیگر محكمه یه عائد مسائلده برعرف و تعامل وجوده کتیرلسی منفعت عمومییه مخالفدر .

فقط اصول محاکمه نك مذکور ماده سنندن استدلال اولدیغنه نظراً ، محكمه ، محل اعتباریله رؤیتده صلاحیتدار اولدیغنی بر دعوائی ، طرفینک ابتدای محاکمه ده بوبابده اعتراضده بولنامق صورتیله اظهار ایدمچکری ضمنی موافقتده اولویتله صریح موافقتده بناءً ، رؤیت ایدمیلور .

§ محكمه کرك رأساً و کرك طرفیندن بری جانبندن طلب وقوعنده ، صلاحیتی حقنده قرار ویرر . محكمه نك صلاحیتدار اولدیغنه دائر ویردیکی قرار ، بو خصوصه متدائر اولان بر اختلافه نهایت ویردیکندن قطعی اولغله برابر محكمه یی وضع ید ایتدیکی دعواذن فراغتده مجبور ایتدیکندن نهائی دکلدر . بناءً علیه اصول محاکمه حقوقیه ۱۳۱۲ سنه سنده ذیل ارلنان ماده قانونیه موجبجه قرار مذکور انجق اساس دعوی حقنده صادر اوله جق نهائی قرار ایله برابر تمیز اولنه بیلر .

بالعکس محکمه صلاحیتدار اولمدیغه دائر اتخاذ ایتدیکی قرار ایله مسئلهدن کفید ایده جکندن . بو قرار نهائیدر . بناءً علیه علیه در حال تمیز محکمه سنه مراجعت قابلدرد . محکوم علیه قرار قبول ایله صلاحیتدار اولدینی اکلایشیلان محکمه یه مراجعت ایتمی ده ممکندر . انجیق بوحالده محکمه نکه ده کندیسی صلاحیتدار عداایتمسی محتمل اولدیغندن بویله بر اختلافی محکمه تمیز تعیین مرجع صورتیله حل ایده رک صلاحیتدار اولان محکمه یی کوسترد .

— ۲ —

§ ۲۱ مارت ۱۳۴۰ قانونی بو اساسلرده بعض تعدیلات اجر ایتمکده در . قانون مزبورک ۶ نجی ماده سی موجبجه « بر دعوانک وظیفه و صلاحیت داخلنده اولمدیغه متعلق مقررات ، دعوا عرضحالک حکمسزلکنی مستلزم اولمایوب دعوانک هاند اولدینی محکمه یه حواله سی ایجاب ایدر . فقط بوتقدیرده اقتضاسنه کوره اولجه استیفا ایدلمه ین ویا نقصان آلان خرج اعلام ایفا و اکمال ایتدیریلیر . »

دعوا عرضحالک حکمسز اولماسی ، دعوا ایا محفوظ بولنان هیچ بر حقلک غائب اولماسی دیمکدر . از جمله صلاحیتدار اولمایان محکمه یه ویریلان عرضحالک دفتره معامله قیدیسی ایفا ایدلدیکی کون مرور زمان قطع ایدلش اولور . و قانونی فائضلر اوکوندن حساب اولونور . خرجلر یکیدن استیفا اولناز . صلاحیتدار اولان محکمه ده دعوانک رؤیتی ایچون ، یکیدن استدعا ویرلک لازم کلز . جز احتیاطی وضع ایدلش اولوبده مدتی ظرفنده صلاحیتدار اولمایان محکمه ده تصدیق جز دعواسی اقامه ایدلش ایسه بو صورتله اکتساب اولنان حقوق محفوظ قالیر .

§ ۱۳۴۰ قانونی ایکی نقطه ده سکوت ایتشدرد :

آ . محکمه نکه عدم صلاحیت حقنده اتخاذ ایتدیکی قراره قارشو بر طریق مراجعت وارمیدر ؟ یوقسه بو قرار قطعاً حواله اولنان محکمه یی تقیید ایدرمی ؟ ا کر بر طریق مراجعت موجود ایسه بو طریقه در حال مراجعت قابلدرد ؟

ب . دعوانک هر حال و درجه سنده صلاحیت اعتراضی در میان اولنه بیلیرمی ؟

بو ایکی نقطه ده قانونک بر اقدینی بوشلنی معقول بر صورتده دولدیره بیلک ایچون اول امرده قانونک استناد ایتدیکی ویا ایتمی لازم کلدیکی اسباب موجه یی توضیح ایدلم . § فقره سابقه ده تور کیده موجود اولان خصوصی محکمه لرک تأسیسلری ایچون

ابتداءً ملاحظه ایدلش اولان اسبابک آرتق قلامش اولدیغنی ایضاح ایتش ایدم . اونک ایچون واضع قانون صلح محکمه لرندن بشقه اولان استثنائی محکمه لریک خذفی موافق بولدی . شوقدرکه ممکن مرتبه حاکم لریک اختصاصی تأمین ایچون محکمه اصلیه نک مختلف دائره له انقسامی حالده هر برینک بر نوع ایشی رؤیت ایتسی هر دائره نک رؤیت ایده جکی ایشلرکده عدلیه وکالتی طرفندن تعیننی موافق کوردی .

بناءً علیه « وضعیت ایجابجه هر محله موجود اوله حق بر بدایت محکمه سنک اساس اعتباریه بالعموم دعاوی بی رؤیت و فصل صلاحیتی اولوب حال و احتیاجه کوره آری آری دوائر تشکیلی حالده دخی صفت اصلیه قضائیه سی مرتفع اوله میه جفندن » محکمه اصلیه نک عدلیه وکالتجه او نوع ایشلری رؤیه مأمور ایدلما یان بر دائره سنه مراجعت ، مصلحت اعتباریه صلاحیت نقطه سندن ، دعوانک ردینی ایجاب ایتماسی معقولدر . کذلک محاکم اصلیه اهمیتلی دعوالری رؤیه مآذون اولدیغندن اهمیتسز اولانلری اولوتیه رؤیه اصلاً صلاحیتدار اولق لازمدر . فی الحقیقه صلح محکمه لری ، محاکم اصلیه نک اهمیتسز ایشلری رؤیت ایتسی منافع عمومییه مخالف بولدیغندن دکل ، بلکه دعوا صاحب لرینه ده یقین و مراجعتی ده سهیل بر محکمه احداث ایتک ایچون تشکیل اولمشدر . بناءً علیه نظریاتده محاکم عمومییه ، رؤیتی صلح محکمه لرینه عائد ایشلری ، مصلحت اعتباریه رؤیه صلاحیتداردر . انجق طرفین اعتباریه رؤیه صلاحیتدار دکلدر . و انلرک صریح و یا ضمنی موافقتلریه بو کبی دعوالری رؤیت ایده بیلرلر .

بناءً علیه محکمه اصلیه نک ، صلح محکمه سنه عائد بر دعوائی رد ایتوب اورایه حواله ایتسی کذلک معقولدر .

« بالعکس صلح محکمه لرینک اهمیتلی ایشلره باقیس جاز اوله ماز . چونکه اوفقی ایشلرده مصرفی ازالتمق و سریع کیتک موافق کوریلور سده بویوک ایشلرک آمین بر صورتده حل ضروریدر . و اونلری رؤیت ایده جک حاکم لردن ده فضل اهلیت طلب اولونور بناءً علیه منطقیاً صلح محکمه سنک ، محکمه اصلیه عائد بر ایشه باقمامسی اصل اولدیغندن بویله بر دعوائی رد ایتسی ایجاب ایدر .

شوقدرکه واضع قانون « وظیفه مسئله سنک تطبیقاتده حکام مخصوصه سی بیله تردد واختلافه سوق ایده کلدیکنی ، دولتک مراجع مخصوصه سنک دخی اکثریا ایچندن چیقامدیغنی مسائل قانونیه بی حل و تمین ایتک وظیفه سنک علی الاطلاق افراده تحمیلی و صوکراده بویکلفتک بالعموم نتایج مادیه سندن دخی مسئول عدی حق وعدل فکریله قابل تألیف ،

اولمادینفی نظر دفته آلهرق صلح محکمه سنکده صلاحیتدار اولمادینی دعوائی رد ایتیمه رک محکمه اصلیه حواله ایتسنی موافق بولمشد .

§ طرفین و موقع اعتباریه صلاحیتدار اولمایان محکمه نك . دعوائی رد ایتیمه رک طأند اولدینی محکمه حواله ایتسنی ایجاب ایدن سبب بوقدر قطعی و آچیق دکلدر . اسباب موجب مضطه سنده بوخصوصده هیچ برملاحظه درمیان اولنماشدر . بز بوحالده دعوانك حواله ایله اکتفا اولنسنی براز تهلكلی کوروپورز . فی الحقیقه مزور مدعیلرک بومساعدۀ قانونیه دن استفاده لری بك مأمولدر .

معلومدرکه صلاحیتدار اولمایان محکمه ده اقامه اولونوب رد اولنان دعوانك مصارفی مدعییه راجعدر . مدعی علیه کده ضرر و زیان طلب حق محفوظدر .

حالبوکه حواله قراری وریلورسه ، محکمه لرک اجتہادی نظر دفته آلهرق ذنبه بیلیر که ، مدعی انحق حواله اولنان محکمه ده اساس دعواسنی قطعی اولهرق غائب ایدرسه مصارف محاکمه ایله محکوم ایدیه بیلیر . بناء علیه مدعی علیه بیهوده اضرار ایدلش اوله بیلیر . کندیسنك حقسنز اولمسی مضاعف بر مصرفله محکومیتی استلزام ایچون کافی دکلدر . چونکه هر مسئله ده حقسنزلق آشکار اولیبوب چوق کره طرفین کندیلرینی حقنی ظن ایتدکاری ایچون ویاخود اسباب ثبوتیه لرینی تدارك ویا حاکمی اقناع ایدمه دکاری ایچون دعوالرینی غائب ایدیه بیلیر . بناء علیه محکوم علیه ضروری اولمایان ویاسبیت ویرمدیکی هیچ بر مصرفله محکوم ایدیه مامسی لازمدر .

دیگر طرفدن صلاحیتدار اولمایان محکمه یه مراجعت ایله هیچ برشی غائب ایتیمه جکندن امین اولان مدعی قصداً مدعی علیه کلمه جکنی حساب ایدمه رک حرکت ایدیه بیلیر .

§ تفصیل اولنان اسباب موجب نظر دفته آلهرق قانونك بوشلنی دولدیرلمق و محذورلری ممکن مرتبه ازاله اولنق لازمدر . بناء علیه ؛

آ . محکمه نك عدم صلاحیتنه بناء ویردیکی حواله قراری نهائیدر . و درحال قابل تمیزدر . وحواله ایدلدیکی محکمه یی تقیید ایدمه مز .

فی الحقیقه بر محکمه نك ، وضعید ایتدیکی دعوادن کفید ایتسنی ایجاب ایدن قرار نهائیدر و مدعینك قانوناً ایجاب ایتدیکی حالده دعواسنك حواله ایدلدیکی اوزاق بر محله کی محکمه ده دعواسنی تعقیبه اجبار اولنسنی جائز اوله ماز . بر محکمه طرفدن دعوانك رؤیتی دیگر محکمه یه طأند بولندیغه دائر ویریلان قرار او محکمه یی تقیید ایدمه می ؟ بزه کوره ایتمامسی لازمدر . زیرا بر محکمه نك عین درجه ده بولنان دیگر محکمه نك قراریه ویاخاصه بر محکمه اصلیه نك بر صلح

محکمه سی قراریه مقید اوله بیلیمسی ایچون صریح بر ماده قانونیه به احتیاج وارددر . نه اسباب موجب مضبوطه سند، نه ده قانونده محکمه لر آره سند سلی صلاحیت اختلاف لریک اورتدن قالدیرلمسی مطلوب اولدیفه دلالت ایدجک هیچ بر قید و اشارت یوقدر . بآعلیه ینه سلی اختلاف مرجع احتمالی تحققی ایدر سه صلاحیتدار محکمه بی اراء ایتسی محکمه تمیزدن طلب اوله بیلیر . شوقدر که طرفیندن بری حواله قراری اوزرینه محکمه تمیزه مراجعت ایدوب قرارمذکور تصدیق اولونور سه بو قرارک حواله اولتان محکمه بی تقید ایتسی معقول اولور .

ب . اصول محاکمه حقوقیه قانونی موجبینه وظیفه مسئله سی رأساً نظر دفته آلتیق لازم کلیر . و طرفیندن هر بری بویه بر اعتراضی دعوانک هر حالنده و درجه سند سر دایده بیلیرلر . بو ماده لر احکامی دائره سند محکمه ، رؤتی دیگر بر دائره ینه طائد مسئله حقیقه رأساً حواله قراریخی اتخاذ مجبورمیدر ؟ طرفیندن هیچ بری اعتراض ایتوب دعوا محکمه ده رؤیت ایدر سه و بریلان حکم مجرد بو نقطه دن نقض اوله بیلیرمی ؟

اسباب موجب مضبوطه سندن اکلاشیلاجنی وجهله بر محکمه نک بوتون دائره لریک هر نوع مسئله بی حل و جسمه مآذونیتلری اصلدر . عدلیه و کالتی طرفندن وقوع بوله حق تخصیص ، اصلاً هر محکمه نک حائر اولدیفنی صلاحیت قضائیه بی تحدید ایتیر . ایشلرک مختلف دائره لر آره سند توزیفنی انتظام داخلی مسئله سیدر . محکمه بدایتده ایشک دیگر بر دائره ینه طائد اولدیفنی کورر سه او دائره ینه حواله ایدر . فقط ایشک ماهیتی اعتباریه نظر دقتی جلب ایتیر سه و بریلان حکمک بوسبیلله نقض اولنسی نظریه اعتباریه دوغری اوله ماز . و بویه بر نقض ، قانونک سبب وضعه آشکاری بر صورتده مخالفدر . حتی بزه کوره حواله قراری بدایتده اتخاذ ایدلیه رک محکمه اساس دعوانک رؤیتده باشلامش ایسه ینه حواله قراری ویرلامک لازمدر .

الیوم مستقل بر تجارت و یا شرع محکمه سی موجود اولمدیغندن موجود محکمه لرک هپسی عین تشکیلاته تابع بر محکمه اصلیه نک جزملری اولدیغندن اصول محاکمه حقوقیه قانونک مارالد کر ماده سه استناداً نقض قراری اعطاسی جائز دکلدر . دیگر طرفدن صالح محکمه نک صلاحیتی داخلنده اولان برایش ، بدایت محکمه سند رؤیت ایدلیکی تقدیرده حکمک نقض اوله جنی حقیقه بر ماده بولمدیغندن محکمه اصلیه ، بویه برایشی حواله ایتکسزین رؤیت ایدر سه حکم ینه نقض اوله ماملیدر . فقط بالعکس صالح محکمه سنک محکمه اصلیه طائد بر دعوائی رؤیتده اصلاً صلاحیتی بولمدیغندن صالح محکمه سنک حواله قراری ویرمیه رک بویه بر دعوائی رؤیت ایتسی نقضی ایجاب ایدر .

مقایسه قوانین

§ فرانسه . محکمه لرك صلاحیتلری هم نوع مصلحت و همده طرفینك بولندقلری موقع اعتباریه تحدید اولمشدر . استثنائی بر محکمهیه ، اصلاً رؤیتیه صلاحیتدار اولمدينی دعوی عرض اولورسه رد اولونور .

فقط بدایت محکمه سنك ، هر نوع ایشلری رؤیت صلاحیتی اصل اولدیغندن طرفین بوبایدہ اعتراضده بولمازلر و محکمه ده مشغولیتی اعتباریه رؤیتیه موافق بولورسه دعوائی نه حواله یه ونده رده مجبور دکلدر . بدایت محکمه سی مختلف دائره لره انقسام ایتدکده هر حالده رئیس اولك معناد وجهله ریاست ایتدیکی برنجی دائره ده حلی اقتضا ایدن ایشلری بر نظامنامه تعیین ایتدکده در . بونك خارجنده بولنان ایشلرك هانکی دائره ده رؤیت ایدیه جکنی ایسه رئیس اول تعیین ایدر . بوبایدہ طرفین وکیللری آره سنده تگون ایدن اختلافی رئیس اول حل ایدر . بالطبع بوسیله حکمك نقضی طلب اولنه ماز .

§ آلمانیا . آ . صلاحیتدار اولمایان محکمه ده اقامه اولنان دعوی رد اولونوب بوقرارده كرك مدتلك مروریله و كرك مافوق محکمه سندن صادر اوله رق قرار ايله قضیه محکمه حالی آلیر ایسه بالاخره دعوانك عرض اولندينی محکمه بو قراره رعایته مجبوردر . بناء علیه بو محکمه ، دعوائی ، حکم سابق و برمش اولان محکمه یه عائد اولدينی اسباب موجه سیله تکرار رد ایده مز . (اصول محاکمه حقوقیه ماده : ۱۱)

ب . ۲۷۶ نجی ماده موجبجه ، بدایت محکمه سی دعوانك رؤیتی صلح محکمه سنك صلاحیتی داخلنده اولدیغه قرار ویررسه دعوائی رد ایتوب دائره قضا سنده بولنان بر صلح محکمه سنه حواله ایدر . مع مافیه بوقرارك ، صلح محکمه سنی قیید ایدیه بیلمسی ایچون . قضیه محکمه حالی آلمسی لازمدر . انجق بوحالده دعوی ، حکمه حواله ایدلدیکی کوستریلان محکمه ده در دست رؤیت عد اولونور .

ج . كرك مصلحت و كرك موقع اعتباریه دعوائی رؤیتیه صلاحیتدار اولمایان بدایت محکمه سی طرفینك صریح و یا ضمنی موافقتلریله اونی رؤیت ایدیه بیلیر (ماده ۳۸) . طرفینك صلاحیت اعتراضی در میان ایتکسزین اساسه کیریشملری ضمنی موافقت عد اولونور . (ماده ۳۹) شوقدر که قانونك منحصر آمعین بر محکمه ده رؤیت ایدیه بیله جکنی بیان ایتدیکی

ویا خود امواله متعلق بولمیان دعوالر طرفین موافقت ایتسه لرده انحق صلاحیتدار اولان محکمه ده رؤیت اولنه بیلیر . بو احوالده طرفین ، محکمه نك حتی موقع اعتباریله اولان صلاحیتی بیله توسیع ایده مز لر . (ماده ۴۰)

§ نوشتاتل . اصول محاکمه لایحه مزده اساس اتخاذ ایدلمکده اولان ۷ نیشان ۱۹۲۵ تاریخلی نوشتاتل قانونی ۷نجی ماده سی موجبجه محکمه مصلح اعتباریله صلاحیتی رأساً نظر دفته آلمق مجبوریتده اولدینی کی طرفین ده بوبابده کی اعتراضلرینی نهایت محاکمه قدر درمیان ایده بیلیر لر .

دیگر طرفدن ۶نجی ماده موجبجه طرفیندن بری ادعاسنك مقداریخی تنقیص ویا خود خصمنك بو بابده کی ادعاسنی قسماً قبول ایتسیله دعوا ، محکمه نك صلاحیتی خارجنده قالیرسه دعوا ردایدلیوب عائد اولدینی محکمه یه حواله اولونور . و محکمه بو کی دعوالر رؤیت مخصوص اولان شفاهی اصول محاکمه تطبیق ایدر .

قانونك ۱۶۸ نجی ماده سی موجبجه مدعی علیه طرفدن درمیان اولنان عدم صلاحیت اعتراضی قبول اولنورسه مدعی صلاحیتدار محکمه ده اصوله توفیقاً یکیدن دعوا اقامه ایتك مجبوریتده در . شو قادار که عدم صلاحیت قرارینك تبیلینی تاریخندن اعتباراً اون کون طرفنده یکیدن صلاحیتدار محکمه ده دعوا اقامه اولنورسه ایلک اقامه اولسان دعوا ایله اکتساب اولنان حقوق محفوظدر .

مصطفی رشید

حقوق فاکولته سی مدرسلرندن

JURISPRUDENCE

اجتهادات محاکمه

مدعیه و . خانم - مدعی علیه ع . افندی

خلاصه : زوجی حربیه کیدر دك اوراده غائب اولدینی تحقق ایتسه مبنی زوجه طرفندن کرک زوجنك غائبلیکنه و کرک اولیلکک فسخنه حکم ایدلسی حقنده درمیان ایدیلن طلب موافق قانوندر .

مدعیه نك قوجاسی ۳۳۰ سنه سی حربیه اشتراك ایتك اوزره عسکراولش و اوتاریخندن بری کندیسنندن خبر الهمامش ایدی . مدعیه قوجاسنك غائب بولمسنه مبنی فسخ نکاح قراری